

বাংলাদেশের স্বাধীনতা যুদ্ধ - দলিল পত্র: সপ্তম খণ্ড

বদর দিবস পালিত পাকিস্তানের অখণ্ডতা ও সংহতি রক্ষার দৃঢ় সংকল্প ঘোষণা

গতকাল রোববার বদর দিবস পালন করা হয়েছে। এ উপলক্ষে গত কাল বিকেলে বায়তুল মোকাররম প্রাঙ্গণে ঢাকা শহর ইসলামী ছাত্র সংঘের উদ্যোগে এক গণ-জমায়েত অনুষ্ঠিত হয়। এরপর এক মিছিল বেরোয়। গণজমায়েতে পূর্ব পাকিস্তান ইসলামী ছাত্র সংঘের সভাপতি জনাব আলী আহসান মোহাম্মদ মোজাহিদ এই বদর দিবস উপলক্ষে সংঘের পক্ষ থেকে একটি ৪ দফা ঘোষণা করেন। তিনি ঘোষণা করেন যে—

(১) “দুনিয়ার বুকে হিন্দুস্তানের কোন মানচিত্রে আমরা বিশ্বাস করিনা যতদিন পর্যন্ত দুনিয়ার বুক থেকে হিন্দুস্তানের নাম মুছে না দেয়া যাবে ততদিন পর্যন্ত আমরা বিশ্বাস নেবনা।” লাইব্রেরী সমূহের প্রতি লক্ষ্য করে তিনি তার দ্বিতীয় দফা ঘোষণা করেন। তিনি বলেন —

(২) “আগামী কাল থেকে হিন্দু লেখকদের কোন বই অথবা হিন্দু-দের দালালী করে লেখা পুস্তকাদি লাইব্রেরীতে স্থান দিতে পারবেননা বা বিক্রি বা প্রচার করতে পারবেননা। যদি কেউ করেন তবে পাকিস্তানের অস্তিত্বে বিশ্বাসী সেচ্ছাসেবকরা আলিয়ে তপ্পা করে দেবে”। জনাব মুজাহিদের বাকি দুটি ঘোষণা হল :

(৩) পাকিস্তানের অস্তিত্বে বিশ্বাসী সেচ্ছাসেবকদের সম্পর্কে বিরূপ প্রচার করা হচ্ছে। যারা এই অপপ্রচার করছে তাদের সম্পর্কে হাশিয়ার থাকুন এবং

(৪) বায়তুল মোকাদ্দাসকে উদ্ধারের সংগ্রাম চলবে। জনাব মুজাহিদ এই ঘোষণা-কে বাস্তবায়িত করার জন্য ছাত্র, কৃষক, শ্রমিক, জনতার প্রতি আহ্বান জানান, তিনি বলেন, —“এই ঘোষণা বাস্তবায়িত করার জন্যে শির উঁচু করে, বুকে কোরান নিয়ে মর্মে মুজাহিদের মতো এগিয়ে চলুন। প্রয়োজন হলে নয়। দিল্লী পর্যন্ত এগিয়ে গিয়ে আমরা বৃহত্তর পাকিস্তানের পতাকা উত্তোলন করবো”।

জমায়েতে ঢাকা শহর ইসলামী ছাত্র সংঘের সভাপতি জনাব মোহাম্মদ শামসুল হক সভাপতিত্ব করেন। বক্তৃতা দেন পূর্ব পাকিস্তান ছাত্র সংঘের সাধারণ সম্পাদক জনাব মীর কাশেম আলী। তিনি বলেন যে,—আজকের বদর দিবসের শপথ হলো :

(ক) ভারতের আক্রমণ রুখে দাঁড়াবো। (খ) দুষ্কৃতিকারীদের খতম করবো। (গ) ইসলামী সমাজ কায়ম করবো। জনাব মোহাম্মদ শামসুল হক বলেন যে, আজকের এই ১৭ই রমজানের পবিত্র দিনে বদরের বীরত্বপূর্ণ ঘটনার আদর্শে উদ্বুদ্ধ হয়ে আমরা বাতিল শক্তিকে নির্মূল করার শপথ নতুন করে নিচ্ছি। গণজমায়েতের প্রত্যেক বক্তা পাকিস্তানের অখণ্ডতা ও সংহতি রক্ষার জন্যে দৃঢ় প্রত্যয়ের কথা ঘোষণা করেন।

পাকিস্তানের সীমান্তে ভারতীয় হামলা চলছে বলে উল্লেখ করে জনগণকে এর বিরুদ্ধে একাত্ম হয়ে সংগ্রাম করার জন্যে তারা আহ্বান জানান। ঐতিহাসিক বদর যুদ্ধ থেকে প্রেরণা ও শিক্ষা লাভের জন্যেও তারা আহ্বান জানান। সভার পর এক মিছিল বেরোয়। নওয়াবপুর রোড হয়ে বাহাদুরশাহ পার্কে গিয়ে তা শেষ হয়। মিছিলের কয়েকটি শ্লোগান ছিল : ১। আমাদের রক্তে পাকিস্তান টিকবে। ২। বীর মুজাহিদ অস্ত্র ধর, ভারতকে খতম কর। ৩। মুজাহিদ এগিয়ে চল, কলিকাতা দখল কর। ৪। বদর দিবস সফল হোক। ৫। ভারতের চরদের খতম কর ইত্যাদি।

—দৈনিক পাকিস্তান, ৮ নভেম্বর, ১৯৭১।

MMK JALAL.